

La Faida da Schons e l'erox legendar Gian Caldar

■ En il temp autmedieval furmava la Val Schons in signuradi infeudà da l'investgieu da Cuira als baruns de Vaz. Il 1338 è passada la val als conts de Werdenberg-Sargans. Il 1424 è s'unida la Val Schons, senza l'accord da ses signur, a la Lia Grischa. Suentur lur sconfitta en la Guerra da Schons e la destrucziun dal chastè da Balamburg, han ils de Werdenberg vendì la Val Schons a l'investgieu (1456). Il 1458 ha la val cumprà ora tut ils dretgs feudals.

Faida da Schons

En il rom da la fundaziun da las Lias èn proruttas en Rezia diversas guerras tranter ils signurs feudals e lur subdits ch'eran s'alliads tranter dad els e per part era cun lur signurs. In exempel furma la Faida da Schons (1450–52), provocada tras l'adesiun dal Schons a la Lia Grischa, decidida cunter la voluntad da lur signur, il cont Heinrich de Werdenberg-Sargans. En la Lia Naira dal 1450 han divers signurs feudals, tranter auter il cont de Werdenberg ed il barun Gieri de Razén, fatg frunt a quest'allianza; ils purs han battì ils signurs en il Schons ed en la Tumleasta, han destrui lur chastels e prendì mesiras penals. La tradiziun raquinta da la dretgira nauscha da la Lia Grischa a Valendau cunter ses traditur congiurà Gieri de Razén, al qual ins ha dentant concess amnestia. Giacun Hasper Muoth ha dechantà quest'episoda en sia ballada «La dretgira nauscha de Valendau (1450)» dal 1882. La noblezza feudala ha subì en la Guerra da Schons sia sconfitta definitiva sco pussanza politica.

Martin Bundi

Lia Naira

Allianza betg attestada dals conts de Werdenberg-Sargans cun il barun Gieri de Razén e l'investg da Cuira Heinrich von Hewen cunter ils da Schons (Faida da Schons, 1451–52). Suentur la mort da Heinrich de Werdenberg-Sargans (1450) è passà il feud episcopal da Schons a ses figls Wilhelm e Jörg. Ils da Schons han refusà da prestar il sarament da subdits envers quels, suenter avair dispità durant dus decennis cun lur bab. Ils dus conts de Werdenberg-Sargans duain alura avair engaschà lur quina Hans de Rechenberg, temi ed odià per sia direzza, sin lur chastè da Balamburg. I vegn raquintà che quest «Gessler retic» haja tirannisà talmain ils purs da Schons, fin che quels hajan tramess el – u il mastral Gola, avugà a Farden – da la val oragiu. Quest'episoda duai avair manà a la constituziun da la Lia Naira ch'ha incumbensà Rechenberg d'attargar il Schons e d'occupar il chastè da Balamburg (1451). Cun agid dals vischins e dals Confederads da la Lia Grischa e da la Lia da la Chadé han ils abitants dal Schons dentant pudì rebatter las truppas da Rechenberg, far praschunier ils manaders e destruir plirs chastels (era en la Tumleasta). L'armistizi e la dretgira nauscha dals 6 d'october 1451 han scumandà al mastral Gola da turnar insacura en la Val Schons. Il barun Gieri de Razén ha apparentamain pudì mitschar a la



La dretgira nauscha da Valendau. (Maletg dal 19avel tschientaner).

stgavazzada mo grazia a l'agid d'in servient raffinà – dechantà da Giacun Hasper Muoth en «La dretgira nauscha de Valendau e sias fontaunas» (1882). La pasch dals 21 da fanadur 1452 ha puspè restitui als da Schons lur dretgs tradids. Il 1458 èn els sa cumprads libers da tut ils impègn feudals e l'investg ha prendì els sco glieud libra en sia protecciun. Dal context istoric enturn ils problems politics en la Val Schons dal 15avel tschientaner fa part, conform al senn, era la ditga da Gian Caldar, erox legendar ed assassin dal tiran da Schons.

Adolf Collenberg

Jörg [Georg] von Werdenberg-Sargans

* 1425, † 1504, da Sargans. Figl da Heinrich e dad Agnes nata de Matsch. ∞ 1) Anna nata de Razén, 2) Barbara nata von Sonnenberg. Cun ses frar Wilhelm ha Jörg von Werdenberg surpiglià il 1447 l'ierta paterna. El ha empruvà da mantegnair il domini, contestà da la populaziun da la regiun da Sargans, e da salvar ils possess al Rain Posterior, smanschads dals Grischuns. En la Lia Naira (ca. 1450) ensemen cun ses quina Gieri de Razén e l'administratur episcopal Heinrich von Hewen ha el subì il 1450 ina sconfitta dolorusa en la guerra cunter ils da Schons revoltants. Questa fin ha accelerà il declin dals dominis feudals retics. Ils chastels dals Werdenberg en la Tumleasta èn vegnids destruids. La vita da Jörg von Werdenberg è dapi alura marcada dal cumbat per ses dretgs e per sia existenza. Il 1456 ha el vendì ses dretgs en la Val Schons, il 1462 las alps en la Val da Lei, il 1463 il domini da Sonnenberg en la Val Druschauna, il 1472 ils dretgs en la Tumleasta Dadens ed il 1475 il signuradi da la Mantogna.

Il 1483 ha el stui vender ses territori d'origin cun il chastè da Sargans als Set Lieus confederads. Il 1493 ha el vendì ses dretgs suverans sur il Valragn e la Stussavgia. Sco domicil e domini al è anc restà Ortenstein en la Tumleasta. Cumbain ch'el disponiva da dretgs territorials confederals ed era bundsman grischun, è el entrà en servetsch austriac e milanais e retirava pensiuns dad omaduas pussanzas; el ha passentà in temp pli lung tar l'archiduca Sigismund von Habsburg a Puntina. Enturn il 1490 ha el formulà projects per in'allianza da la Confederaziun cun la Baviera e cun Vaniescha (Lia antihabsburgaisa). Jörg von Werdenberg è stà activ sco negoziader, intermediatur e derschader da cumpromiss en conflicts difficils. El è mort sco davos represchentant da sia schlatta, politicamain e finanziarmain ruina, ed ha relaschà sis uffants illegitims.

Martin Bundi

Gieri de Razén

Attestà per l'emprima giada il 1435, † avant il november 1458. Figl da Heinrich VI e da Verena, descendenta da la schlatta svabaisa dals von Stoffeln. Quina da Jörg von Werdenberg, ∞ Elisabeth nata von Krenkingen. Il 1451 è Gieri de Razén sa participà a la Lia Naira concludida dals conts de Werdenberg-Sargans cunter quels da Schons cun l'intent (invan) da salvar l'urden feudal. La dretgira nauscha da Valendau ha bain acquità Gieri de Razén, sia reputaziun e sia pussanza èn però sa sminuidas per vita duranta. Quella dretgira è daventada famosa tras la ballada da Giacun Hasper Muoth, «La dretgira nauscha de Valendau e sias fontaunas» (1882).

Linus Bühler

Heinrich von Hewen

* ca. 1400 a Schwarzenbach (vischnanca da Jonschwil/SG), † 22 da november 1462 a Constanza. Figl dal barun Peter, da la Svevia, e da la contessa Anna nata von Werdenberg-Heiligenberg. Studis a Vienna a partir dal 1415, alura a Roma e Padua. Decan dal chapitel cathedral a Strassburg 1423–36. Prevost da Beromünster 1424–36. Canoni a Constanza a partir dal 1426, prevost dal chapitel cathedral da Constanza 1435–41, investg da Constanza 1436–62, administratur da l'investgieu da Cuira 1441–56. Heinrich von Hewen ha organisà e dirigì las tractativas d'accumodament en la Guerra d'ierta dal Toggenburg. El ha empruvà, senza success, da far restituir a sia famiglia il signuradi da Hewen. Uvestg refurmativ sin il champ ecclesiastic ed administrativ e mediatur d'ina conduita spiritua-la irreproschabla.

Thomas Frei

Gian Caldar

Erox legendar da la Muntogna da Schons dal 15avel tschientaner. Tenor la legenda residia in nausch avugà dal cont de Werdenberg-Sargans sin il chastè da Farden. Ina giada duai avair chatschà il famagl da quel plirs chavals sin la pastgira da Gian Caldar ch'haja puspè scurrentà quels cun la furtga e saja perquai vegnì mess en fermanza. Suentur sia deliberaziun saja l'avugà s'envidà sez a gentar tar Gian Caldar. A maisa duai el avair spidà sin il past, cumandond als Caldars da mangiar quel. Gian Caldar haja prendì il tiran per la tation, haja chatschà il chau da quel en la stgadella ed haja alura stranglè el. Giacun Hasper Muoth ha descritt questa scena famosa sco suonda: «Sche maglia ti tez, ha Caldar lu sgargnu, / La pult che ti has da maniera cunghiu. / E'vent igl ugau guspìrau il puschlau, / Ha Gian il malmund culla detta strunglau.» Cun agid da la glieud da la val haja Gian Caldar alura mess fieu als chastels da Farden e da Balamburg. La legenda cumpara savens en la litteratura grischuna ed en ils cudeschs da scola.

Martin Bundi

Balamburg

Ruina d'in chastè ed aclau da la vischnanca politica d'Andeer, situads a ca. 1100 m a la via veglia al sid da la vischnanca principala ed a l'entrada en la Puntcrap. 1257 Balamburg, Bernburch, tudestg Bärenburg. Dal chastè da Balamburg existan restanzas d'in grond implant. A l'ost èn sa mantegnidas parts dal mir da tschinta ed al sid il foss entaglià en il grip. Il temp da construcziun è nunconuscent. Signurs de Balamburg èn attestads per l'emprima giada il 1257. Balamburg era il center da l'administraziun signurila dal contadi da Schons ch'è passà il 1338 sco feud da l'investg da Cuira als conts de Werdenberg-Sargans. Il chastè è vegnì destrui il 1450 en la Faida da Schons e n'è betg pli vegnì reconstrui. En las runcas sur Balamburg, a la via da transit per il Spleia ed il San Bernardin, sa chattavan il 1808 set chasas d'allevaturs da muvel e d'agriculturs.

Jürg Simonett

Sins

La ruina dal chastè dad Alt-Sins al vest da Pasqual consista d'in complex dubel cun in chastè avanzà al sidvest ed in chastè principal al nordost, quest ultim cun ina tur d'abitat da quatter plauns cun in'entrada auta ad artg radund al terz plaun. La tur è integrada en il mir da tschinta che posseda ina structura marcanta (Opus spicatum). L'implant erigì enturn il 1200 era probablmain ina fundaziun dals baruns de Vaz ch'han utilisà il sco

center administrativ dal signuradi en la Tumleasta. Suentur l'extincziun dals de Vaz è passà Alt-Sins als conts de Werdenberg-Sargans.

Da la ruina dal chastè da Neu-Sins al sidost da Pasqual sper la curt da Canova èn mantegnids relicts d'ina tur d'abitat radunda da quatter plauns cun curnisch dentada. A l'intern existan fastizs da l'equipament d'abitat, tranter auter ina gronda chappa da chamin, fimagls, in auariel, ina latrina cun lavandin, ina fanestra cun nischa da seser e parts d'ina pigna da laina. Il mir da tschinta circumdescha ina pitschna curt. L'implant è vegnì costrui dals baruns de Vaz probablmain en l'emprima mesadad dal 13avel tschientaner. El è passà sco ierta dals de Vaz als conts de Werdenberg-Sargans. Sco il chastè dad Alt-Sins è era quel da Neu-Sins vegnì destrui dals abitants da la val en la Faida da Schons (1451) e n'è betg pli vegnì reconstrui.

Maria-Letizia Boscardin

Hochjuvalt


Cun il num Juvalta vegnan designadas las ruinas da las fortezzas da Hochjuvalt ed Innerjuvalt, construidas dals signurs von Juvalta en il territori da la vischnanca da Giuvaulta. Situà sin in sparun grippus stretg e spundiv, era il chastè da Hochjuvalt (savens numnà faussamain Niederjuvalt) dividi en duas parts: l'areal da defensiun inferior cun la fortezza externa, situada a la riva dal Rain Posterior, e quel superiur cun l'implant principal. Da quest ultim existan restanzas da la tur principala da tschintg plauns, d'in edifiz annex, dals foss e dal mir da tschinta. La zona d'entrada è per gronda part vegnida destruida e la veglia via d'access è cuverta da glera. Da la fortezza externa è sa mantegnida sulettamain ina part dal mir, donnegià durant la construcziun da la via. Hochjuvalt è vegnì erigì probablmain en il 12avel tschientaner sco sedia dals signurs von Juvalt. En possess da l'investg da Cuira il 1352, è il chastè vegnì impegnà pliras giadas en il decurs dal 15avel tschientaner. Donnegià probablmain il 1451 en la Faida da Schons, è el vegnì bandunà enturn il 1500 ed è menziunà gia enturn il 1550 sco ruina.

Maria-Letizia Boscardin

Amsler

Schlatta oriunda da Flums. En il 15avel tschientaner èn plirs commembers stads en servetsch da l'investg da Cuira. Hug (1381) e Hans (1389) èn documentads sco servs dal signuradi episcopal da Flums. Tranter il 1410 ed il 1452 è documentà a Cuira differentas giadas Johannes, l'emprim sco canoni e cantor, pli tard sco prevost dal chapitel cathedral; en questa funcziun intermediaria el il 1448 en ina disputa tranter il barun Gieri de Razén ed il president communal da Razén, Dysch Schmid. Ils 21 da fanadur 1452 presidia el ina dretgira da cumpromiss per reglar la Faida da Schons tranter il cont de Werdenberg-Sargans d'ina vart e la Lia Grischa e la Lia da la Chadé da l'autra. A partir dal 1433 è documentà in Heinrich sco portascut en servetsch episcopal, il 1411 sco ministerial episcopal sin il chastè dad Alt-Aspermont ed il 1446 sin la fortezza da Wynegg. Il 1442 sigillescha el sco emprima perditga per in emprest episcopal. A Cuira ha vivì in portascut Hartmann († 1454). La famiglia è s'extinguida en il 15avel tschientaner.

Martin Bundi



Ruinas che regordan a la Faida da Schons: Balamburg (Andeer), Alt-Sins (Pasqual) e Hochjuvalt (Gjuvaulta).

Lexicon Istoric Retic

Il LIR cumpiglia bundant 3100 artgels (geografics, tematics, artgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.